




Kyra Hoevertsz cu su team tin medaya na bista



ORANJESTAD (AAN)--- E ciudad di Greensboro (North Carolina) ta sede e siman aki di e Campeonato Nacional di Merca di landamento sincroniza y ta treciendo hunto e mihor di e mihornan den e deporte aki di henter e país Norteamericano. Pa por a competi aki, e landadoranan mester a pasa den un proceso di clasificación fuerte durante simannan largo. Remarcable ta cu Aruba ta representa na e campeonato máximo aki cu dos atleta: Anouk Eman den e categoría senior y Kyra Hoevertsz den e categoría junior. Anouk ta entrena cu e equipo di Lindenwood University na St. Louis, mientras cu Kyra ta entrena cu e equi-

po di Walnut Creek Aquanats di California. Anouk a bin pa competi den e evento di duet, mientras cu Kyra competi den e prueba di team. Aruba por ta sumamente orguyoso, pasobra na mitar caminda di e campeonato, ambos atleta tin bista riba medaya!

Pa Kyra como integrante di e equipo di Walnut Creek, e participación na e Campeonato Nacional di Merca ta e punto mas halto di e aña competitivo.

Hunto cu su compañeranan di equipo, nan a traha duro pa logra e meta aki.

Den e categoría Junior, e ocho atletanan ta participa prome den e evento di figuración técnico, cu ta forma

50% di e puntuación total. Tur ocho integrante mester landa bon, pasobra e promedio di nan resultadonan di figuración técnico ta conta. E categoría Junior e biaha aki ta conta cu no menos cu 115 atleta participando, Kyra sigur a aporta bon pa yuda hisa e promedio pa su equipo, mirando cu ela termina na di 29 puesto, loke ta hopi bon.

Pa Walnut Creek Aquanats, e contrincantenan di mas fuerte ta nan eterno rivalnan, esta e Santa Clara Aquamaids, tambe di California. Después di e figuración técnico, e equipo di Aquamaids tabata dilanti, pero cu un diferencia mínimo di 0.7 punto! Esaki ta nifica cu e actuación riba música, esta e rutina liber, mester a bai bon. Aki tambe e contrincantenan a mostra un poco mas fuerte y actualmente ta na prome lugar, cu Walnut Creek net nan tras na segundo lugar.

Sin duda esaki ta un excelente resultado, mirando cu lo ta pa prome biaha cu un landador sincroniza di nos isla chikito ta yega asina leu den un campeonato internacional di e nivel aki.

Speransa ta cu e equipo di Walnut Creek, cu tin Kyra Hoevertsz di Aruba como un di su integrantenan, lo sa di mantene of mehora nan posición diasabra awor den e finalnan, pa asina nan trece bek un medaya, tambe pa Kyra di nos país.

Comité Olimpico Arubano ta desea Kyra Hoevertsz tur clase di éxito diasabra awor, durante e finalnan di e Campeonato Nacional di Merca di landamento sincroniza.